

主席、各位議員、各位市民：

早安，我是中大同人文化推廣前自救學會幹事會成員李沛悅。係發表意見之前，我都必需表達對於友會中大同人文化推廣學會未有出席今次特別會議既深切遺憾，無計啦人地要搞鬼屋嘛。

講返戲仿豁免先啦，同人文化講既其實係一班志同道合既人去做刊物、畫冊等各媒體既創作，而當中又有好大部份係藉著現有作品所做既衍生創作。係外地，同人創作其實係培育本地創意工業既重要階梯來架，同人創作既經歷係漫畫家、作家、音樂家等等創作者出道前既試煉，係一種值得被尊重同保護既文化，而絕對唔止係玩玩下架。

(順帶一提，玩玩下同玩下係差好遠架，不過上次馮生係研討會好似唔多分到，其實馮生想補下中文我有好介紹架。)

同人文化好似離各位議員好遠，但我亦必需要講，同人文化有幾好經已有兩個政黨既議員發現左架啦！仲要係立法會以內兩大強國黨，啊 sorry 係強黨先啱！第一個就係民建聯啦！大家可以睇下呢幅圖：雖然睇落好似平平無奇既 banner，但大家留意呢隻公仔，佢就係近年同人文化圈中極為出名既中國擬人啦！原來同人可以咁愛國架，怪唔得禮義、啊係民建聯咁支持同人文化啦！

咁第二個黨又係邊個呢？大家一睇呢張圖就知啦：建哥 cosplay 火影啊！原來就係工聯會！建哥為將同人推廣到社區之間簡直訓埋身，無視街坊既強力恥笑都要 cosplay 住咁落區拉票。所以話工聯會有幾支持同人文化絕對睇得出啦！

但係死啦！原來呢兩種做法都係犯法架！cosplay 係未經授權將平面製作成立體，而 banner 又未經授權用人哋角色。我地點可以俾兩大強國黨墮入法網架呢？所以各議員，今次修訂絕對會係一次史無前例橫跨左中右各黨派既同人自救大行動！係呢個時候，等小弟幫各位睇下有邊個豁免方案可以保護同人，等你地除咗投票以外唔駛睇文件嘛。

講到豁免，第一、二方案仲有民責，雖然對一 D 政黨來講都有北方源源不絕既資源，但果 D 錢係留來派蛇齋餅糶架嘛？又睇下第三方案，兩個情況都唔似戲仿㗎，雖然健哥 cosplay 又真係幾滑稽既。但係咁都唔穩陣。

原來三個方案都唔得，咁點算呢？其實正如一開始所講，同人文化本身就係一樣值得被尊重同重視既文化。從同人文化既根本而言，衍生作品同原創作品係互惠互利而非競爭，所以當衍生既作品唔會取代原有作品既市場，又點解唔可以豁免同人既衍生作品呢？

主席，我會強烈建議政府當局及各界議員認真審視及考慮由民間所提出既第四方案，亦即「個人用戶衍生創作」(簡稱 UGC)，藉此對同人文化有所保護而保存本地創意工業既進步階梯，以至各位落力支持同人既議員。多謝主席。